

Na osnovu člana 54. stav (3) Zakona o sportu ("Službene novine Kantona Sarajevo", br. 45/12-prečišćeni tekst i 36/21), člana 69. stav (1) Statuta Općine Centar Sarajevo – prečišćeni tekst („Službene novine Kantona Sarajevo“, broj 23/04), Odluke o načinu provođenja javnog interesa Općine Centar Sarajevo u oblasti sporta ("Službene novine Kantona Sarajevo", broj 45/25), u vezi sa tačkom 5. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 37/24), Općinski načelnik donosi

**PRAVILNIK**  
**O KRITERIJIMA ZA DODJELU SREDSTAVA ORGANIZACIJAMA U SPORTU SA**  
**CILJEM PROVOĐENJA JAVNOG INTERESA OPĆINE CENTAR SARAJEVO U OBLASTI**  
**VRHUNSKOG SPORTA**

**I - OPĆE ODREDBE**

**Član 1.**  
**(Opće odredbe)**

Ovim Pravilnikom utvrđuje se način i postupak dodjele sredstava organizacijama u sportu za finansiranje/sufinansiranje programa/projekata u oblasti vrhunskog sporta u tekućoj kalendarskoj godini (u daljem tekstu: "Pravilnik"), sa ciljem afirmacije ove oblasti i postizanja vrhunskih rezultata.

**Član 2.**  
**(Definicije pojmova)**

- (1) Organizacije u sportu su: klub, sportsko društvo, sportski savez definisani Zakonom o sportu Kantona Sarajevo, koji svojim djelovanjem ostvaruju javni interes Općine Centar Sarajevo (u daljem tekstu „Općine“) u oblasti sporta.
- (2) Vrhunski sport u smislu ovog Pravilnika podrazumijeva aktivnosti koje obuhvataju pripremu i takmičenje s ciljem ostvarivanja vrhunskih sportskih rezultata.

**Član 3.**  
**(Finansiranje aktivnosti)**

- (1) Sredstva za finansiranje/sufinansiranje programa/projekata iz člana 1. mogu se koristiti za:

- a) održavanje sportskog terena ili sportskog borilišta (isključuje nabavku mehanizacije);
- b) odlazak na takmičenja sportskih ekipa i pratećeg osoblja (putni troškovi – prijevoz, ishrana, smještaj);
- c) troškove priprema za takmičenja;
- d) troškove administrativnog osoblja i administrativnih usluga;
- e) nabavka sportske opreme čija pojedinačna vrijednost ne prelazi 1.000,00 KM;
- f) ostali troškovi koji su neophodni za rad organizacije u sportu (režijski troškovi i slično).

- (2) Od ukupno dodijeljenih sredstava iz Budžeta Općine (u daljem tekstu: „Budžet“) maksimalno 20% se može koristiti za pokrivanje troškova iz stava (1) tačka d).

- (3) Od ukupno dodijeljenih sredstava iz Budžeta Općine maksimalno 10% se može koristiti za pokrivanje troškova iz stava (1) tačka f).

- (4) Sredstva za finansiranje/sufinansiranje programa/projekata iz stava (1) ovog člana dodijeljivat će se i za aktivnosti koju su realizovane i provedene prije objavljivanja Javnog poziva, u tekućoj kalendarskoj godini.

## **II - JAVNI POZIV ZA PODRŠKU VRHUNSKOM SPORTU**

### **Član 4. (Javni poziv)**

- (1) Načelnik Općine najmanje jednom godišnje raspisuje Javni poziv za dodjelu sredstava za oblast vrhunskog sporta na području Općine (u daljem tekstu: "Javni poziv").
- (2) Sredstva za realizaciju Javnog poziva planiraju se svake godine u Budžetu, shodno raspoloživim finansijskim sredstvima.
- (3) Ukupan iznos sredstava za finansiranje/sufinansiranje programa/projekata iz člana 1. ovog Pravilnika, kao i iznos sredstava koja se dodjeljuju prema kategorijama - pojedinačni (individualni) ili timski (kolektivni) sport, biće utvrđeni Javnim pozivom.
- (4) Javni poziv se objavljuje na web stranici Općine, a sadrži opće i posebne kriterije koje organizacije u sportu moraju ispunjavati, rok i način za podnošenje prijave, te druge podatke.
- (5) Javni poziv obavezno sadrži:
  - a) predmet,
  - b) visinu sredstava koju jedan korisnik može ostvariti,
  - c) potrebnu dokumentaciju,
  - d) način prijave na Javni poziv,
  - e) način odabira korisnika,
  - f) obavještanje prijavljenih korisnika.
- (6) Prijave na Javni poziv podnose se u roku koji ne može biti kraći od 15 dana, niti duži od 60 dana, a što će biti tačno određeno tekstom Javnog poziva.
- (7) Prijave na Javni poziv podnose se lično na protokol ili putem preporučene pošte na adresu Općina Centar Sarajevo, Služba za obrazovanje, društvene djelatnosti, kulturu i sport, Mis Irbina 1, 71000 Sarajevo, u zatvorenoj koverti sa naznakom punog naziva Javnog poziva za koji se prijavljuje – „Javni poziv za dodjelu sredstava za oblast vrhunskog sporta na području općine Centar Sarajevo“.
- (8) Obrazac prijave na Javni poziv se smatra sastavnom dokumentacijom Javnog poziva, te prijave na Javni poziv neće biti uzete u razmatranje i dalju analizu bez adekvatno popunjenog obrasca.
- (9) Obrazac prijave na Javni poziv će se nalaziti uz tekst Javnog poziva, na službenoj stranici Općine Centar Sarajevo ([www.centar.ba](http://www.centar.ba)), a koji će zainteresovani preuzeti, isprintati, potpisati i ovjeriti pečatom od strane ovlaštenog lica za zastupanje.
- (10) Sve stranice, kao i početnu stranicu Obrasca za prijavu na Javni poziv je potrebno numerisati i ovjeriti pečatom Organizacije u sportu.
- (11) Redni broj stranice originalnog ili ovjerenog dokumenta koji se prilažu uz Obrazac moguće je i ručno navesti i ovjeriti pečatom Organizacije u sportu.
- (12) Sva potrebna dokumentacija kojom se dokazuje ispunjenje kriterija za finansiranje/sufinansiranje programa, projekata mora biti originalna ili ovjerena kopija, ne starija od 6 mjeseci, odnosno ukoliko drugačije nije navedeno Javnim pozivom.
- (13) Neblagovremene i nepotpune prijave neće biti uzeti u razmatranje. Pristigla dokumentacija se ne vraća podnosiocima prijave nakon završenog Javnog poziva.

(14) Organizacije u sportu koje se prijavljuju na Javni poziv mogu aplicirati samo sa jednim programom/projektom.

### **Član 5. (Pravo učešća)**

- (1) Pravo učešća na Javni poziv iz člana 4. stav (1) imaju organizacije u sportu sa sjedištem na području Općine koje ispunjavaju opće i posebne kriterije, a čiji program/projekat za cilj ima postizanje vrhunskih rezultata u tekućoj kalendarskoj godini.
- (2) Na Javni poziv se mogu prijaviti organizacije u sportu za odlazak i nastup takmičara/ekipa seniorskog nivoa, na slijedećim takmičenjima:
  - a) Olimpijske i paraolimpijske igre;
  - b) Svjetska takmičenja;
  - c) Evropska takmičenja;
  - d) Balkanska/regionalna takmičenjima;
  - e) Državna takmičenja.
- (3) Na Javni poziv se može prijaviti organizacija u sportu koja prema programu/projektu planira zvaničnu organizaciju evropskog ili svjetskog takmičenja na području Općine.
- (4) Pravo učešća na Javnom pozivu nije dopušteno organizacijama u sportu koje, do dana raspisivanja Javnog poziva, nisu u potpunosti izvršile pravdanje utroška za prethodno dodijeljena sredstva iz Budžeta za ovu namjenu, i koje ne izmiruju redovno obaveze prema pravnim licima čiji je osnivač Općina, a što se utvrđuje uvidom u evidencije nadležne Službe za obrazovanje, društvene djelatnosti, kulturu i sport (u daljem tekstu: "Služba").

### **Član 6. (Opći kriteriji)**

- (1) Učešće na javnom pozivu imaju organizacije u sportu koje ispunjavaju slijedeće opće kriterije:
  - a) programski ciljevi usklađeni sa javnim interesom Općine u oblasti sporta;
  - b) imaju registrovano sjedište na području Općine;
  - c) nemaju dugovanja po osnovu poreza i doprinosa za zaposlene;
  - d) aktivan račun u banci;
  - e) obezbijeđeni tehnički i ljudski resursi;
  - f) član su strukovnog saveza i nemaju dugovanja prema istom;
  - g) nastupaju na zvaničnim takmičenjima saveza i ispred saveza na zvaničnim međunarodnim takmičenjima;
  - h) nisu bile obuhvaćene suspenzijom najmanje godinu dana do dana objavljivanja Javnog poziva;
  - i) da se pripremaju za odlazak i nastup takmičara/ekipa seniorskog nivoa na takmičenja iz člana 5. stav (2), da učestvuju ili organizuju takmičenja;
  - j) imaju registrovane članove.

### **Član 7. (Posebni kriteriji)**

- (1) Pravo učešća na Javnom pozivu imaju organizacije u sportu čiji prijedlozi programa/projekata sadrže:
  - a) Jasno naznačenu ciljnu grupu i očekivane rezultate, aktivnosti usmjerene na pripremu i takmičenje sportista s ciljem afirmacije vrhunskog sporta, sa specifikacijom troškova u skladu sa članom 3. Pravilnika;

- b) Opis tradicije Organizacije u sportu - historijat;
- c) Kratak opis Organizacije sa podacima o prethodno realizovanim projektima i kvalifikaciji kadrova koji implementiraju program/projekat (odgovorne osobe, saradnici, volonteri);
- d) Značaj programa/projekta za Općinu;
- e) Vrsta planiranih aktivnosti i mjesto njihovog održavanja;
- f) Planirani metod rada i očekivani rezultati;
- g) Predviđeni broj učesnika i njihova starosna dob;
- h) Aktivnosti koje promovišu takmičarski sportski duh i fair play u oblasti sporta;
- i) Informaciju da li se program/projekat kojim se aplicira za finansiranje/sufinansiranje odnosi na pojedinačni (individualni) ili timski (kolektivni) sport.

### **Član 8. (Potrebna dokumentacija)**

(1) Podnosioci prijava na Javni poziv, u svrhu dokazivanja ispunjavanja općih i posebnih kriterija, trebaju dostaviti slijedeću dokumentaciju:

- a) obrazac prijave na Javni poziv sa obrascem projektnog prijedloga, koji će se objavljivati uz tekst Javnog poziva kao zaseban dokument (treba biti ispunjen, potpisan i ovjeren pečatom osobe ovlaštene za zastupanje);
- b) Aktuelni izvod iz Registra nadležnog organa u kojem je registrovan podnosilac prijave, iz kojeg je vidljivo da ima registrovano sjedište na području Općine (ne stariji od tri mjeseca od dana objavljivanja Javnog poziva);
- c) Uvjerenje o izmirenim poreskim obavezama i doprinosima za zaposlene ili sporazum o odgođenom plaćanju ili plaćanju u ratama dužnih javnih prihoda (ne stariji od tri mjeseca od dana objavljivanja Javnog poziva);
- d) Potvrda iz poslovne banke da račun nije blokiran, iz koje se vidi broj transakcijskog računa (ne stariji od mjesec dana od dana objavljivanja Javnog poziva);
- e) Izjava, potpisana i ovjerena kod nadležnog organa, kojom podnosilac prijave potvrđuje:
  - da ima obezbijeđene tehničke uslove i ljudske resurse za realizaciju planirane aktivnosti (potrebno je da sadrži i mjesto održavanja planiranih aktivnosti);
  - broj članova organizacije u sportu;
  - da se priprema za odlazak i nastup takmičara/ekipa seniorskog nivoa na takmičenja iz člana 5. stav (2);
- f) Potvrda strukovnog saveza (kantonalni, federalni ili državni), ne starija od tri mjeseca od dana objavljivanja Javnog poziva, koja treba da sadrži podatke da podnosilac prijave:
  - jeste član saveza;
  - redovno izmiruje obaveze prema savezu;
  - nastupa na zvaničnim takmičenjima saveza i ispred saveza na zvaničnim međunarodnim takmičenjima;
  - nije bio obuhvaćen suspenzijom najmanje godinu dana do dana objavljivanja Javnog poziva;
  - jeste učestvovao i/ili postigao rezultate na takmičenjima u posljednjoj takmičarskoj sezoni, odnosno učestvovao u organizaciji domaćih ili međunarodnih takmičenja u tekućoj godini ili Izjava na vlastitom memorandumu da podnosilac prijave nije učestvovao na takmičenjima, odnosno u organizaciji domaćih ili međunarodnih takmičenja (potpisana i ovjerena pečatom osobe ovlaštene za zastupanje).

(2) Dokumentacija iz ovog člana podnosi se u originalu ili ovjerenoj kopiji ne starijoj od 6 mjeseci, osim ako nije drugačije utvrđeno Javnim pozivom.

(3) Provjera ispunjavanja uslova iz člana 5. stav (4) ovog Pravilnika izvršit će se službenim putem.

### **Član 9. (Bodovanje)**

(1) Bodovanje kriterija će se vršiti na osnovu dostavljenog Obrasca prijave na Javni poziv, koji mora biti ispunjen, potpisan i ovjeren pečatom osobe ovlaštene za zastupanje, te dokumentacije iz priloga istog.

(2) Bodovanje programa/projekata će se vršiti samo na prijavama koje zadovolje opće kriterije iz člana 6. ovog Pravilnika, prema slijedećim kriterijima.

(3) Bodovanje će se provoditi na sljedeći način:

a) Organizacija u sportu prema programu/projektu planira pripreme za nastup/učešće:

| KATEGORIJA TAKMIČENJA            | INDIVIDUALNI SPORT | EKIPNI SPORT |
|----------------------------------|--------------------|--------------|
| Olimpijske i paraolimpijske igre | 10                 | 10           |
| Svjetska takmičenja              | 8                  | 8            |
| Evropska takmičenja              | 6                  | 6            |
| Balkanska/ regionalna takmičenja | 4                  | 4            |
| Državna takmičenja               | 2                  | 2            |

b) Organizacija u sportu ostvarila rezultat u prethodnoj takmičarskoj sezoni:

| KATEGORIJA TAKMIČENJA            | INDIVIDUALNI SPORT |          |          | EKIPNI SPORT |          |          |
|----------------------------------|--------------------|----------|----------|--------------|----------|----------|
|                                  | 3 mjesto           | 2 mjesto | 1 mjesto | 3 mjesto     | 2 mjesto | 1 mjesto |
| Olimpijske i paraolimpijske igre | 10                 | 15       | 20       | 10           | 15       | 20       |
| Svjetska takmičenja              | 8                  | 9        | 10       | 8            | 9        | 10       |
| Evropska takmičenja              | 6                  | 7        | 8        | 6            | 7        | 8        |
| Balkanska/ regionalna takmičenja | 4                  | 5        | 6        | 4            | 5        | 6        |
| Državna takmičenja               | 2                  | 3        | 4        | 2            | 3        | 4        |

- *Ukoliko je organizacija u sportu u ukupnom poretku, na međunarodnom prvenstvu, ostvarila rezultat od četvrtog do desetog mjesta tabele - 1 bod*
- *Postigla rezultat, kojim je postavila državni rekord - 10 bodova*

c) Organizacija u sportu ostvarila plasman na takmičenje:

| KATEGORIJA TAKMIČENJA            | INDIVIDUALNI SPORT | EKIPNI SPORT |
|----------------------------------|--------------------|--------------|
| Olimpijske i paraolimpijske igre | 30                 | 30           |
| Svjetska takmičenja              | 25                 | 25           |
| Evropska takmičenja              | 20                 | 20           |
| Balkanska/ regionalna takmičenja | 15                 | 15           |
| Državna takmičenja               | 10                 | 10           |

- *Ukoliko je organizacija u sportu učestvovala u kvalifikacijama za takmičenja i nije ostvarila plasman, broj bodova se umanjuje za 50% bodova određenih gore navedenom tabelom.*

d) Organizacija u sportu prema programu/projektu planira zvaničnu organizaciju takmičenja na području Općine:

| KATEGORIJA TAKMIČENJA | INDIVIDUALNI SPORT | EKIPNI SPORT |
|-----------------------|--------------------|--------------|
|-----------------------|--------------------|--------------|

|                                  |    |    |
|----------------------------------|----|----|
| Olimpijske i paraolimpijske igre | 30 | 30 |
| Svjetska takmičenja              | 25 | 25 |
| Evropska takmičenja              | 20 | 20 |
| Balkanska/ regionalna takmičenja | 10 | 10 |
| Državna takmičenja               | 5  | 5  |

e) Tradicija kluba:

| HISTORIJA ORGANIZACIJE | INDIVIDUALNI SPORT | EKIPNI SPORT |
|------------------------|--------------------|--------------|
| Duža od 5 godina       | 1                  | 1            |
| Duža od 15 godina      | 3                  | 3            |
| Duža od 25 godina      | 5                  | 5            |
| Duža od 50 godina      | 20                 | 20           |

f) Broj aktivnih članova organizacije u sportu:

| BROJ ČLANOVA | INDIVIDUALNI SPORT | EKIPNI SPORT |
|--------------|--------------------|--------------|
| Do 10        | 5                  | 5            |
| Od 11 - 100  | 10                 | 10           |
| 101-500      | 15                 | 15           |
| 501+         | 20                 | 20           |

(4) Ukupan iznos raspoloživih budžetskih sredstava dijeli se proporcionalno broju ostvarenih bodova i to prema sljedećoj formuli:  $\text{Dodijeljena sredstva} = \text{Broj osvojenih bodova} \times \text{raspoloživa budžetska sredstva} / \text{ukupan broj bodova svih prijava}$

### III - RAD KOMISIJE I PRIJAVA NA JAVNI POZIV

#### Član 10. (Formiranje i zadatak Komisije)

(1) Za analizu, obradu i vrednovanje pristiglih programa/projekata formirat će se Komisija za obradu i analizu pristiglih prijava na Javni poziv za dodjelu sredstava za oblast vrhunskog sporta na području Općine Centar Sarajevo, iz reda državnih službenika (u daljem tekstu: Komisija).

(2) Komisiju iz stava (1) ovog člana, na prijedlog Službe, imenuje Općinski načelnik rješenjem, a ista broji tri člana i jednog zamjenskog člana.

(3) Prilikom formiranja Komisije vodit će se računa da članovi poznaju oblast sporta i finansija.

(4) Pored članova, imenuje se sekretar Komisije koji će za potrebe rada Komisije obavljati administrativne poslove.

(5) Članovi Komisije iz stava (1) ovog člana, uključujući i sekretara, ne ostvaruju pravo na novčanu naknadu za rad.

(6) Komisija će izvršiti, u skladu sa Javnim pozivom, analizu, obradu i vrednovanje kriterija prema zaprimljenim prijavama i predložiti iznos za dodjeljivanje sredstava, samo ukoliko su zadovoljeni opći i posebni kriteriji Javnog poziva.

(7) Minimalni iznos koji može ostvariti jedna Organizacija u sportu – podnosilac prijave iznosi 1.000,00 KM. Maksimalni iznos koji može ostvariti jedna Organizacija u sportu – podnosilac prijave iznosi 33% od ukupnog iznosa sredstava utvrđenih za realizaciju Javnog poziva.

(8) Prijave kandidata koje ne ispunjavaju uslove navedene u općim i posebnim kriterijima iz Javnog poziva, neće biti uzete u razmatranje.

(9) Nakon analize, obrade i vrednovanja pristiglih prijava, Komisija iz stava (1) ovog člana sačinjava Preliminarnu listu potpuno analiziranih pristiglih prijava, koja sadrži:

- a) Preliminarnu rang listu organizacija u sportu koje ispunjavaju sve uslove navedene u općim i posebnim kriterijima iz Javnog poziva, sa utvrđenim brojem ostvarenih bodova ;
- b) Listu organizacija u sportu koje ne ispunjavaju uslove navedene u općim i posebnim kriterijima iz Javnog poziva.

(10) Preliminarnu listu potpuno analiziranih pristiglih prijava iz prethodnog stava Komisija dostavlja na verifikaciju Općinskom načelniku, nakon čega je objavljuje na službenoj web stranici Općine.

(11) Organizacija u sportu – podnosilac prijave može podnijeti prigovor lično na protokol ili putem pošte na adresu Općina Centar Sarajevo u roku od sedam (7) dana od dana objavljivanja Preliminarne liste potpuno analiziranih pristiglih prijava, i to na listu na kojoj se nalazi. Pristigle prigovore će razmatrati Komisija iz stava (1) ovog člana, koja će u roku od tri (3) dana od dana ulaganja prigovora odlučiti o istom.

(12) Nakon isteka roka za prigovore, odnosno donošenja odluka po prigovorima, Komisija pristupa izradi Prijedloga odluke o dodjeli sredstava, čiji je sastavni dio lista uspješnih organizacija u sportu i visina iznosa dodijeljenih sredstava.

(13) Nakon što nadležna Služba za finansije da pozitivno mišljenje, Prijedlog odluke o dodjeli sredstava se dostavlja Općinskom načelniku, koji donosi konačnu Odluku o dodjeli sredstava.

(14) Odluka o dodjeli sredstava objavljuje se na službenoj web stranici Općine.

(15) Nakon usvajanja Odluke iz prethodnog stava, Općinski načelnik će sa korisnicima budžetskih sredstava sklopiti ugovore kojima će se detaljno odrediti prava i obaveze ugovornih strana.

(16) Služba za obrazovanje, društvene djelatnosti, kulturu i sport pruža svu neophodnu administrativno tehničku podršku radu Komisije.

### **Član 11. (Sukob interesa članova Komisije)**

(1) Svaki član Komisije iz člana 10. stav (1) dužan je potpisati Izjavu o nepristranosti i povjerljivosti (u daljem tekstu: "Izjava") koji će biti sastavni dio Rješenja o imenovanju Komisije.

(2) Svaki član Komisije iz člana 10. stav (1), će biti isključen iz postupka dodjele sredstava ukoliko se utvrdi da je u sukobu interesa sa podnosiocem prijave, a o čemu se utvrđuje prilikom davanja Izjave o nepristranosti i povjerljivosti i koju utvrđuje donositelj Rješenja.

(3) Svako lice koje posjeduje dokaze o sukobu interesa između člana Komisije i podnosioca prijave na Javni poziv može iste dostavi u pismenoj formi Općini Centar Sarajevo.

### **Član 12. (Utrošak sredstva)**

(1) Sa korisnicima sredstava kojima su dodijeljena sredstva sklopit će se ugovor o namjenskom utrošku sredstava i isti su dužni u roku od 30 dana od okončanja aktivnosti, odnosno utroška sredstava dostaviti narativni i finansijski izvještaj o utrošku dodijeljenih

sredstava, sa pratećom finansijskom dokumentacijom, kojom jasno dokazuju da je program/projekat realizovan.

(2) Za sredstva koja nisu utrošena ili su djelimično utrošena u budžetskoj godini, korisnici sredstava su dužni dostaviti izvještaj o utrošku sredstava na dan 31.12. tekuće godine najdalje do 31.01. naredne godine, a konačan izvještaj najkasnije u roku od 30 dana po okončanju projekta.

(3) Prihvataju se troškovi koji su nastali u periodu od 01.01. do 31.12. tekuće budžetske godine, u kojoj je Javni poziv objavljen.

(4) Korisnik sredstava koji u utvrđenom roku ne opravda dodijeljena sredstva, obavezan je ista vratiti i nema pravo ponovnog apliciranja na Javni poziv po istom osnovu naredne godine.

(5) U toku perioda korištenja dodijeljenih sredstava, Općina zadržava pravo vršenja kontrole utroška finansijskih sredstava. U slučaju osnovane sumnje za nezakonito ili nenamjensko trošenje Ugovorom dodijeljenih sredstava, Općina zadržava pravo da pokrene proceduru povrata sredstava.

(6) U toku realizacije programa/projekta, korisnici sredstava, u slučaju bilo koje promjene okolnosti za realizaciju programa/projekta ili promjene adrese, broja telefona, mail-a ili promjene kontakta, ovlaštene osobe ili broja računa kod banke, dužni su obavijestiti u pisanoj formi Općinu, koji se neće smatrati odgovornim u slučaju da ne uspije kontaktirati podnosioca prijave.

#### **IV - PRELAZNE ODREDBE**

##### **Član 13.**

Izmjene i dopune Pravilnika vrše se na način kao i postupak za njegovo donošenje.

##### **Član 14.**

Javnim pozivom će biti detaljnije definisani kriteriji koji nisu obuhvaćeni ovim Pravilnikom.

##### **Član 15.**

Ovaj Pravilnik stupa na snagu narednog dana od dana objavljivanja na Oglasnoj ploči Općine Centar Sarajevo, a naknadno će biti objavljen u "Službenim novinama Kantona Sarajevo" i na službenoj stranici Općine Centar Sarajevo ([www.centar.ba](http://www.centar.ba)).

**OPŠTINSKI NAČELNIK**

Srđan Mandić

Broj: 13-11-6790/25

Sarajevo, 1.12.2025. godine

Na Oglasnoj ploči Općine Centar Sarajevo objavljen dana 1.12.2025. godine